



Selasa, 27 September 2022

Ogen: Masmur 1:1-3



Ngukurisa Suari Ras Berngi



Pesan guru man ajar-ajarna segelah kai si pelajarina wari enda kari i rumah iuli-ulihika. Engkai maka iulih-ulihika terus pelajaran e, segelah banci iantusi dengen enggo tersuan bas perukuren. Reh rusurna ioge, reh rusurna ipelajari reh tangkasna pengertin dengen reh pentarna pe. Adi enggo bage lanai jadi kebiaren kune ngalaken ujin, sabap pelajaran e enggo iantusi dengen enggo ersada bas kegeluhen.

Pemasmur mpersingeti kita maka kemalemene ate jadi sekerajangen kalak si matuhi Undang-undang Dibata dengen ngukurisa suari ras berngi. Patuh man Dibata e mabai pemasmur guna ertedeh ate rusur ngukuri KataNa suari ras berngi. Ertina, tep-tep wari kata Dibata e lit i bas pusuh perukuren. Kata e labo terjeng tading bas Pustaka ioge terjeng kebaktin minggu, PJJ, PA Kategorial entah bas paksa teneng saja, tapi iukuri terbagezen kenca ioge, kai nge ndia sura-sura Dibata man bangku arah kataNa si ku oge enda? Kenca enggo si eteh si man bahanen, lakokenlah! Kata Dibata e mereken gegeh man banta guna nadingken perbahanen si la payo dengen ngelakoken perbahanen si payo. Kinata si idah enterem kalak kristen megika kata Dibata tapi la seh ku pusuh, e maka la melanangko, erbual, korupsi seh munuh. Adi siperdiateken kasus pembunuhan sesama POLRI, apai pe Kristen, tapi la teridah buah kinitenkenna man Tuhan. La kinlah kata Dibata e terjeng i begi tapi lanai iukuri suari ras berngi? Kinitenkenta ras perbahanenta arusna min sembaba, jadi persembahen si ngeluh dengen merim man baNa. Lagu langkah si cidahken kita e ulih bas kita ngorati dengen ngukuri kataNa suari ras berngi. Kata Dibata e jadi identitas dirita labo terjeng arah KTP tapi lebih teridah arah perbahanenta si tep-tep warina e me ndalanken si mehuli, badia, adil ras mulia. Kalak si bage ngaloken kemalemene ate kap.